

Script of Morning Gojri News Bulletin 30 August 2026 at 1015Hrs

مارننگ گو جری نیوز بلیٹن مو رخہ 30 اگست 2026

یوہ آکاشوانی جموں ہے محمد امین انجم تیں خبر سنو۔

PM-MKB

وزیر اعظم نریندر مو دی ملک تے بیرون ملک رہن آلا لوکاں سنگ اچ سویر 11 بجے آکاشوانی غا من کی بات پروگرام غے تحت اپنا خیالات سانجھا کریں گا۔ ماہانہ ریڈیو پروگرام غی یاہ 137 ویں قسط وے گی۔ یوہ پروگرام اے آئی آر نیوز ویب سائٹ تے نیوز آن آئر مو بائل ایپ سمیت آکاشوانی تے دور درشن غا تمام چینلاں تیں نشر وے گو۔ اسے راہ اے آئی آر نیوز، ڈی ڈی نیوز، وزیر اعظم غا دفتر تے اطلاعات و نشریات وزارت غا یوٹیوب چینلاں وری یوہ پروگرام براہ راست نشر وے گو۔ ہندی نشریات تیں فوراً بعد آکاشوانی اس ریڈیو پروگرام غو علاقائی زبانان مانہ ترجمو نشر کرے گو۔

LG Health

لیفٹنٹ گورنر منوج سنہا نے "ہیلتھ سروسز اینی ٹائم اینی وئیر" یعنی صحت خدمات کسے وی وقت کتے وی غا نظریہ نال تیجا سی آئی آئی جموں کشمیر ہیلتھ کنکلیو غو سرینگر مانہ افتتاح کیو۔ اس موقع ور بولتاں وان لیفٹنٹ گورنر نے ٹیلی میڈیسن، مصنوعی ذہانت، ڈرون غے ذریعے طبی سامان غی فراہمی وغیرہ غا زیادہ استعمال واسطے کہیو۔ انہاں نے باقاعدہ جانچ تے ابتدائی مداخلت غے ذریعے علاج تیں بچائو در تبدیلی واسطے کہیو۔ موصوف نے میڈیکل تے نرسنگ غی تعلیم غا باہدا غی ضرورت اور سحت کارکناں غی حمایت اُجاگر کی۔ ایل جی موصوف نے کہیو جے جموں کشمیر صحت دیکھ بھال غا مرکز غے طور ور وجو دمانہ آرہیو ہے۔

Jatindra PMGSY

مرکزی وزیر ڈاکٹر جتندر سنگھ نے پچھلا 12 بہراں مانہ اُدھم پور، کٹھوعہ، ڈوڈہ پارلیمانی حلقہ نانہہ ترجیح دین واسطے وزیر اعظم مودی غو شکریو ادا کیو۔ ویں 27/2026 پی ایم جی ایس وائی 4 بیچ 1 غے تحت 110 سڑک پروجیکٹاں غونی پتھر رکھن تیں بعد گل کر رہیا تھا۔ مذکورہ پروجیکٹ اُدھم پور، کٹھوعہ، ڈوڈہ، کشتواڑ خطہ غا بکھ بکھ حصاں نانہہ جوڑیں گا۔ قابل ذکر ہے جے یہ پروجیکٹ 1 ہزار 5 سو 3 عشاریہ 53 کروڑ روپیاں غی لاگت نال منظور کیا گیا ہیں جن غی گل ملا غے لمبائی 5 سو 98 عشاریہ 45 کلو میٹر ہے۔

Chhatroo Case

کانگریس غا سینئر لیڈر تے سابق وزیر غلام محمد سروری نے خصوصی تحقیقات غی خاطر چھاترو معاملو کرائم برانچ نانہہ منتقل کرن غا سلسلہ مانہ سہولت دین واسطے لیفٹنٹ گورنر منوج سنہا غو شکریو ادا کیو ہے۔ جناب سروری نے کہیو ہے جے اس تیں پہلاں لیفٹنٹ گورنر نے ذاتی طور ور اُن نال ٹیلی فون ور گل کی تھی تے یقین دوايو تھو جے

معاملو کرائم برانچ نانہ منتقل کیو جائے گو۔ انہاں نے اُمید ظاہر کی ہے جے اس معاملہ غی چہان بین شفاف، پیشہ وارانہ طریقہ اور وقت غی پابندی کرتاں واں کی جائے گی، تے اس سلسلہ غا ذمہ داراں نانہ قانون غے تحت کیفر کردار تک پچایو جائے گو۔

IFFJK Preparation

جموں کشمیر غا پہلا بین القوامی فلم میلہ غی خاطر تیاری کر لی گئی ہیں۔ یوہ میلہ 7 تیں 10 ستمبر 2026 بشکار سرینگر، جموں تے گلبرگ مانہ منعقد وے گو۔ میلہ غے دوران 41 ملکاں تیں فلم دسی جائیں گی، جہیڑی اپنو بین القوامی کردار اُجا گر کریں گی۔ اس سلسلہ مانہ بکھ بکھ سرگرمیاں واسطے انتظامات کیا جا رہیا ہیں۔ اس ضمن مانہ جگہ غا انتظام، سلامتی تے ٹریفک ضابطہ در خاص دھیان دتو جا رہیو ہے۔

UG Admission

اعلیٰ تعلیم محکمہ جموں کشمیر نے جموں کشمیر غا سرکاری ڈگری کالجاں مانہ انڈر گریجوٹ داخلہ غا سلسلہ غو دوجو مرحلو شروع ہون غو اعلان کیو ہے۔ اس سلسلہ مانہ اُن طالب علماں واسطے داخلہ کا روائی کھلی ہے جہیڑا 12 ویں غا بائی اینول سپلمنٹری یاہ پرائیوٹ امتحانات 2026 مانہ اہل قرار دتا گیا ہیں۔ یہ داخلہ مرکزی پورٹل برائے داخلہ JKadmissions.in غے ذریعے منعقد ویں گا۔

Weather

محکمہ موسمیات نے آئندہ 9 تیہاڑاں مانہ جموں کشمیر مانہ عام طور ور گرم تے نم موسم غی پیشنگوئی کی ہے تے کہیو ہے جے کئیں جگہیں ہلکی بارش تے گرج چمک وی ہوسکے۔ آکاشواںی جموں غا نمائندہ نے رپورٹ توری ہے جے ان تیہاڑاں مانہ سویر غے وقت تے بعد دوپہر کتے کتے ہلکی بارش یاہ گرج چمک ہو سکے۔ قابل ذکر ہے جے 31 اگست تے یکم ستمبر نانہ موسم عام طور ور گرم تے نم رہن غو امکان ہے جد کہ کئیں جگہیں 1 یاہ 2 بار ہلکی تیں درمیانہ درجہ غی بارش اور گرج چمک ہو سکے۔

اس غے نال ہی خبراں غو یوہ بلیٹن ختم ہوؤ۔